



**INFORMACIJA O AKTIVNOSTIMA PO PROJEKTU
„AKCIJA ZAJEDNICE ZA ENERGETSKU TRANZICIJU
(CAET) U BOSNI I HERCEGOVINI (BIH)“**

OBRADIVAČ:

Stručna služba za poslove Općinskog načelnika

PREDLAGAČ:

Općinski načelnik

RAZMATRA I USVAJA:

Općinsko vijeće



OPĆINA KAKANJ
Općinski načelnik

MUNICIPALITY OF KAKANJ
Municipality Mayor

Broj: 02/1-_____/25
Kakanj, 21.10.2025. godine

OPĆINA KAKANJ

Općinsko vijeće

PREDMET: Informacija o aktivnostima po projektu „Akcija zajednice za energetska tranziciju (CAET) u Bosni i Hercegovini (BiH)“

1. Uvodne informacije o projektu

Projekat “Akcija zajednice za energetska tranziciju (CAET) u Bosni i Hercegovini (BiH)” odobren je od strane njemačkog Federalnog ministarstva za ekonomsku saradnju i razvoj (BMZ), a implementira ga **Deutsche Gesellschaft für Internationale Zusammenarbeit (GIZ) GmbH** u saradnji sa **Ministarstvom vanjske trgovine i ekonomskih odnosa BiH (MVTEO)**.

CAET pomaže Bosni i Hercegovini u naporima da energetska tranziciju učini održivom i da ispunji obaveze zemlje prema Ugovoru o energetska zajednici. Kako bi promovisao energetska tranziciju na lokalnom nivou, CAET je usmjeren na podršku jedinicama lokalne samouprave (JLS) u razvoju projekata u okviru koncepta energetskih zajednica — **Zajednica obnovljive energije (ZOE)**.

Privredna/Gospodarska komora Federacije BiH je u martu 2024. godine objavila poziv za učešće na informativnim sesijama u sklopu projekta. Općina Kakanj se prijavila te učestvovala u online sesiji i sesiji održanoj u Privrednoj komori Zeničko-dobojskog kantona u martu i aprilu 2024. godine. Predstavnici Općine Kakanj bili su uposlenici Odsjeka za razvojno planiranje i upravljanje lokalnim razvojem, Odsjeka za zaštitu okoline, te direktor Razvojnog centra Općine Kakanj.

Na informativnim sesijama objašnjeno je da će tehnička asistencija GIZ-a uključivati razvoj kapaciteta i pripremu poslovnih planova, studija izvodljivosti i projektne dokumentacije (idejnog i glavnog projekta) za projekte energetska zajednice koji su planirani za razvoj ili se već nalaze u fazi pripreme.

Nakon održavanja sesija, GIZ je 15.04.2025. godine objavio javni poziv za prikupljanje prijava od JLS sa projektnim idejama. Svaka JLS mogla je aplicirati sa više ideja, od kojih će biti odabrana ona koja je najzrelija i najspremnija za realizaciju. Kriteriji bodovanja uključivali su spremnost dokumentacije i dozvola, stepen kofinansiranja od strane JLS, usklađenost projekta sa strateškim dokumentima (Strategija razvoja, SECAP), te uključivanje žena u timove aplikanta.

Općina Kakanj je putem Odsjeka za razvojno planiranje i upravljanje lokalnim razvojem aplicirala sa tri projektne ideje koje su se odnosile na izgradnju fotonaponskih elektrana (FNE) na različitim objektima: administrativna zgrada Općine Kakanj, objekti JU „Kulturno-sportski centar“ Kakanj i krovne površine JU za predškolski odgoj i obrazovanje „Mladost“ Kakanj.

Komisija GIZ-a i Privrednih komora FBiH i RS provela je evaluaciju u junu 2024. godine. Nakon intervjua, projektna ideja Općine Kakanj odabrana je kao jedna od osam (8) za koje će GIZ pružiti tehničku asistenciju u razvoju kapaciteta i pripremi studije izvodljivosti i projektne dokumentacije.

Svečano potpisivanje **Memoranduma o razumijevanju između GIZ-a i Općine Kakanj** održano je 24.09.2024. godine u okviru **Sarajevske sedmice energije i klime (SECW)**.

Svrha potpisivanja Memoranduma je razvoj implementacionog koncepta (studije izvodljivosti) za projektnu ideju energetske zajednice u općini Kakanj, koja predviđa korištenje obnovljivih izvora energije za proizvodnju električne energije, prvenstveno radi zadovoljenja energetskih potreba članova zajednice.

Svrha i cilj projekta: je osnivanje Zajednice čija je primarna djelatnost proizvodnja energije iz obnovljivih izvora energije, a primarna svrha Zajednice jeste da obezbijedi ekološku, ekonomsku ili društvenu korist za svoje članove, a ne samo finansijsku dobit.

U okviru tehničke asistencije GIZ-a (2024–2025), Općina Kakanj je dobila podršku koja je obuhvatila:

1. Edukaciju predstavnika o konceptu zajednica obnovljive energije u skladu sa EU i BiH pravnim okvirom.
2. Pripremu studije izvodljivosti za fotonaponsku elektranu na krovu administrativne zgrade Općine Kakanj.
3. Izradu liste potrebnih dozvola i koraka za dobivanje statusa zajednice obnovljive energije.
4. Pripremu osnivačkih akata potrebnih za formiranje udruženja (u daljem tekstu: Udruženje), koje će u skladu sa važećim propisima u narednom periodu dobiti status Zajednice obnovljive energije.

Nastavak tehničke asistencije GIZ-a obuhvatit će:

1. Finansiranje izrade idejnog i glavnog projekta prema projektnom zadatku.
2. Savjetovanje i podršku u pribavljanju potrebnih dozvola (elektroenergetska saglasnost, priključenje na distributivnu mrežu).
3. Mogućnost apliciranja na GIZ-ov **Javni poziv za Grant Facility** za osiguranje dijela investicionih sredstava. Očekivani iznos kofinansiranja iznosi **150.000,00 KM (oko 70% ukupne investicije)**.
4. Tehničku podršku tokom izvođenja radova, instalacije sistema, testiranja i puštanja u rad.

1. Kontekst i pravni okvir

U skladu sa Zakonom o korištenju obnovljivih izvora energije i efikasne kogeneracije („Službene novine FBiH“, broj 82/23) Federalno ministarstvo energije, rudarstva i industrije je donijelo Pravilnik o zajednicama obnovljive energije („Službene novine FBiH“, broj 65/25), koji je stupio na snagu 04.09.2025. godine (u nastavku teksta „Pravilnik“), koji propisuje uslove za dobivanje statusa zajednice, njihova prava i obaveze, tehničke zahtjeve i učestvovanje jedinica lokalne samouprave u realizaciji projekata.

U skladu sa članom 2. Pravilnika, Zajednica označava pravno lice:

- 1) koje proizvodi energiju iz obnovljivih izvora i zasniva se na otvorenom i dobrovoljnom učešću članova, autonomna je i efektivno se kontroliše od strane članova suvlasnika koji se nalaze u blizini projekta postrojenja obnovljive energije i koje je u vlasništvu i razvijeno od tog pravnog lica,
- 2) čiji su članovi fizička lica, mala/srednja preduzeća kako su definisani propisima koji uređuju njihov rad i/ili jedinice lokalne samouprave uspostavljene propisima kojima se uređuje lokalna samouprava, te ustanove i preduzeća u većinskom vlasništvu jedinica lokalne samouprave,
- 3) čija je primarna svrha da obezbijedi ekološke, ekonomske ili društvene koristi za svoje članove ili za lokalne oblasti gdje su locirana, a ne samo finansijsku dobit.

2. Uloga udruženja u projektu

Projekti u ovom obliku mogu biti realizovani u različitim pravnim formama tj. sa različitim pravnim subjektom. Na osnovu pravnih analiza tima stručnjaka, kao rezultat tehničke asistencije projekta koji implementira GIZ, donesen je zaključak da je osnivanje udruženja najprihvatljivija pravna forma za realizaciju predmetnog projekta.

Udruženje će biti pravni subjekt za provođenje i upravljanje projektom. Ovakav oblik:

- omogućava jednostavnije osnivanje i transparentno upravljanje zajednicom,
- omogućava otvoren pristup novim članovima sa teritorije općine (pravnim i fizičkim licima),
- poštuje zakonske propise i usmjerava funkciju u korist lokalne zajednice — upravo u skladu s međunarodnim standardima i EU pravnom stečevinom koja je prenešena u zakonodavstvo Federacije Bosne i Hercegovine.

3. Planirani članovi zajednice i osnivači udruženja

Projekt predviđa sljedeće subjekte, kao članove Zajednice i osnivače Udruženja:

- **Općina Kakanj**, uloga: stavlja na raspolaganje krovnu konstrukciju administrativne zgrade za instaliranje fotonaponske elektrane (FNE), te ulaže finansijska sredstva za implementaciju projekta.
- **JU „Kulturno-sportski centar“ Kakanj**, osnivač Općina Kakanj, uloga: doprinosi svojim vremenom i radom u realizaciji projekta, te u budućem periodu stavlja na raspolaganje svoje objekte za izgradnju novih projekata fotonaposnkih elektrana (FNE).
- **JP „Grijanje“ d.o.o. Kakanj**, osnivač Općina Kakanj, uloga: doprinosi svojim vremenom i radom u realizaciji projekta, te u budućem periodu stavlja na raspolaganje svoje objekte za izgradnju novih projekata fotonaposnkih elektrana (FNE).

Svi članovi, uz jasno definirane uloge, ulaze dobrovoljno u realizaciju projekta i osnivanje Udruženja.

5. Benefiti projekta za lokalnu zajednicu

- **Energija i troškovi:** Smanjenje troškova za energente iz javne potrošnje.
- **Klimatska odgovornost:** Proizvodnja čiste energije doprinosi smanjenju emisija utjecaja na okoliš.
- **Edukacija i društveni razvoj:** Uključivanje građana u energetske tranzicije stvara dugoročnu vrijednost kroz znanje i društvenu koheziju.
- **Finansijska održivost:** Mogućnost kofinansiranja kroz međunarodne izvore, uključujući GIZ.

Ovim projektom inicira se dugoročna, održiva i javno korisna strategija prelaska na čiste izvore energije u Općini Kakanj. Inicijativa, realizovana kroz model udruženja građana, osigurava fleksibilan, transparentan i pravno utemeljen okvir za upravljanje Zajednicom obnovljive energije, te donosi značajne koristi za lokalnu zajednicu, naročito u pogledu smanjenja javnih troškova i unapređenja energetske nezavisnosti.

Imajući u vidu navedeno Općini Kakanj, JU „Kulturno-sportski centar“ Kakanj i JP „Grikanje“ d.o.o. Kakanj kao osnivačima Udruženja i kao budućim članovima Zajednice je potrebna podrška i saglasnost OV-a za realizaciju **projekta instalacije fotonaponske elektrane (FNE) na krovu administrativne zgrade Općine Kakanj**, koji se provodi u okviru koncepta **Zajednice obnovljive energije** i to za ključne faze projektnog razvoja, koje obuhvataju:

- formiranje Udruženja,
- ishodovanje potrebnih dozvola,
- dobivanje statusa Zajednice obnovljive energije,
- te realizaciju same investicije, u skladu sa važećim pravnim i strateškim okvirima.

Bez podrške i saglasnosti Općinskog vijeća i bez formalnog osnivanja Udruženja, **projekat zajednice obnovljive energije ne može biti realizovan**. Također, u tom slučaju **Općina Kakanj ne bi mogla ostvariti pravo na kofinansiranje investicije** kroz GIZ-ov Javni poziv za **Grant Facility**. Kako bi se projekat uspješno i nesmetano realizovao, neophodno je osigurati **logističku, upravljačku i formalnu podršku**, uključujući sve potrebne saglasnosti za provođenje aktivnosti i osnivanje Udruženja. U tom kontekstu, od **Općinskog vijeća Kakanj** se traži davanje:

- 1) **Saglasnosti** za realizaciju projekta **instalacije fotonaponske elektrane (FNE) na krovu administrativne zgrade Općine Kakanj**, koji se odvija u okviru koncepta **Zajednice obnovljive energije**, u cilju nastavka naredne faze tehničke asistencije GIZ- i dobivanja finansijskih sredstava za realizaciju projekta.
- 2) **Saglasnosti Načelniku Općine Kakanj, organima upravljanja i rukovođenja JU „Kulturno-sportski centar“ Kakanj i JP „Grikanje“ d.o.o. Kakanj, tj. planiranim članovima zajednice obnovljive energije** za poduzimanje svih potrebnih aktivnosti u realizaciji predmetnog projekta.

- 3) **Saglasnosti Načelniku Općine Kakanj, organima upravljanja i rukovođenja JU „Kulturno-sportski centar“ Kakanj i JP „Grijanje“ d.o.o. Kakanj, tj. planiranim članovima zajednice obnovljive energije za poduzimanje svih potrebnih aktivnosti u vezi osnivanja i rada Udruženja**, koje će u skladu sa važećim propisima dobiti status Zajednice obnovljive energije.

Nakon osnivanja Udruženja OV će posebnom Odlukom dati Udruženju na korištenje krov administrativne zgrade Općine Kakanj, a radi instalacije fotonaponske elektrane (FNE) koja će biti u vlasništvu Udruženja.

U slučaju prestanka rada Udruženja imovina Udruženja postaje vlasništvo Općine Kakanj.

Projektni tim GIZ-a stoji na raspolaganju za sva dodatna pitanja i pojašnjenja u vezi sa implementacijom i narednim koracima projekta.

S poštovanjem.

OPĆINSKI NAČELNIK

Mirnes Bajtarević